

LAGURAEAN

BILBO

Erresidentzia egingo dabe Bilbo Zaharrean

Foru Aldundiak eta Bilboko Udalak hitzarmena berbatu eben atzo, Bilbo Zaharreko Harrobi plazan erresidentzia eta eguneko zentro barriak egiteko. Bertan ehun erretiratuentzako leku izango dala jakin eragin eben Josu Bergara ahal-dun nagusiak eta Iñaki Azkunak uriburuko alkateak. Proiektu horretan 11 milioi euroko inbetsinoa egingo dabe, erresidentzia eregiteaz batera, plazea urbanizatu eta Gimnasio kalea zabalduko dabe eta.

PORTUGALETE

Udal aurrekontuei osoko zuzenketea egin deusie

Portugaleteko Abetzale eta Ezkertiarra taldeak osoko zuzenketea egin deusio Udalak aurkeztutako kontu proposamenari. Txostena berandu jaso daben arren, sakon aztertu eta zuzentzeko aukera izan dabela esan dau taldeak. Izan be, proposamen horretan aurreko urteetan euren eta oposizioen beste taldeek egindako zuzenketak onartu dirala ikusi dabe, eta gauzak horrela egin beharrean egokiago dala uste dabe aurretik berba egin eta danak ados ipintea.

KULTUREA

'Oliver' musikalaren entsegu Euskaldunan

Umeei zuzenduta dagoen *Oliver* obra musikalaren entsegu nagusia gaur egingo dabe Euskalduna Jauregian. Charles Dickens idazlearen *Oliver Twist* klasikoa euskerara moldatu dabe, eta horregaz hasiko da Aldundiak Gabonak 2002 kultur zabalpenerako gertatu dauen programea. Urtarrilaren 2 eta 3an ikusiko dan obran Bergarako Orfeoiko 130 kidek abestu eta antzeztuko dabe.

METROA

Bost minuturo izango da Gabon Zahar gauean

Metro Bilbaok aurreko urte bietan egin eban lez, zerbitzu berezia eskainiko dau gaur gauean. Gabon Zahar gauean uriguneko tabernetara joan gura dabenek autoa dagoen lekuan itxi eta garraio segurua izango dabe norabide bietan. Danetara, 250 ren zerbitzu ipiniko ditue, goizaldeko 01:00etatik 07:00etara bitartean. Ehun bat beharginek egin dabe lan gau horretan zerbitzua emoteko.

AURREKONTUAK. Urtarrilaren 1ean 2002ko kontuak luzatuko ditue

Kontuak luzatu beharko ditue Udalak eta Aldundiak

Azkunak eta Bergarak oposizioari leporatu deusie erantzunkizuna

Erredakzioa

Iñaki Azkuna Bilboko Alkateak eta Josu Bergara Bizkaiko ahal-dun nagusiak bat etorri ziran atzo, biek zuzentzen dituen erakundeetan, Udalak eta Diputazioan, datorren urteari begira indarrean dagozan aurrekontuak luzatu egin beharko dituela onartzerakoan. Batak eta besteak oposizioen taldeei leporatu deusie horren erantzunkizuna.

Uriburuko alkateak gogoratu ebanez, agintea hartu ebanetik aurrekontu barri barik jardutea kritikau deusie oposizioen taldeek, azkenengo hiru urteetan Josu Ortuondoren taldeak itxitako kontuak luzatuz jardun behar izan daudelako. Azkunak zehaztu eban, hori bai, berari aurrekonturik osotzen itxi ez

deusien arren, oposizioen taldeek ez daukiela alternatibarik. «Baserriarraren txakurra lez dabilza: euren jan ez, eta besteoi jaten itxi bez», esan eban.

Oposizioen taldeei esan eutsen (PP, PSE, Sozialista Abertzaleak eta EB) berak gai badira kontu bateratuak osotzeko, egin daiezala, «lau urte izan ditue heresiak egiteko. Beste zenbait gauzetan batzeko arazorik ez dabe izaten», ganeratu eban Azkunak: «Ni orain lau urte Batasunagaz batu izan banintz, orain lau urte eukiko nituan aurrekontuak, baina ez dot horrelakorik egin ez dabelako indarkeriarik salatu».

Diputazioa, babes barik

Josu Bergara ahal-dun nagusiak, bestalde, datorren urtean Dipu-

tazioak «seguruenik» indarrean dagozan aurrekontuak luzatu beharko dituala onartu eban, bere taldeak ez daudelako oposizioen talde bakar baten babesa lortu.

Kontuen proposamena egin da dagoen arren, Gobernu Batzordeak ez dau txostena onartu gura izan, alperrik litzatekeala pentsetan dabelako.

Foru agintariak onartu ebanez, bere taldeak bertan behera itxi ditue dagoeneko, akordioa berbatzeko oposizioen talde batzuekin izan dituen kontaktuak. «PSE taldeagaz ahalegin bat egin neban, baina bai euren bai geuk argi euki dogu hauteskundeak izateko gitxi falta danean hauek ez dirala unerik gozoenak holako zerbait egiteko», ganeratu eban Bergarak.

BILBO. Zerbitzu automatiko eta barrituak dituen azpiegitureak jarri ditue

Itxaropen kaleko komunak barriztatu egin ditue



LUIS JAUREGIALTZO / ARGAZKI PRESS

Itxaropen kalean, frontoiaren albo-alboan, komunak izan dira Udalak barriztatu dituan azkenak. Lurpean egozan komunak zarratu ostean —«garbitasun eta segurtasun faltagaitik», Andoni Rekagorri Osasun Saileko zinegotziaren berbetan—, Udalak zerbitzu automatiko eta barrituak izango dituenen azpiegiturengaitik ordezkatzuko ditue garai bateko komunak. Gaur egun holako bederatzi komun dagoz, eta datorren urtean beste hiru ipiniko ditue Casilda Iturrizar Parkean, Cocherito de Bilbao kalean eta Campo Volantin pasealekuan. Itxaropen kaleko komunetan 135.919 euroko inbertsinoa egin dabe.

INGURUMENA

Muskiz eta Bermeon behar barik dagozanek garbituko ditue hondartzak

Erredakzioa

Muskiz eta Bermeoko 43 langabetu kontratau ditue Prestige ontziaren fuel hondakinengaitik aitatutako udalerrri biotan kalte-tuak izan diran hondartzak garbitzeko. INEM erakundeak beharginon soldatak diruz lagundituko ditu, Muskizeko 40 langabetuak 85.573 euroekin, eta Bermeoko hiruak 6.418 euroekin.

Enplegu erakundeak Bizkaiko kostaldeko udalerrri guztiei egin eutsen proposamena. Muskiz eta Bermeo izan ezik, ganerakoek ez eben erantzun, edo Espainiako Administrazioaren diruari ezetz esan eutsien.

URIGINTZEA

Uriburuko urigintzea, arkitekturea eta artea aztertuko ditue, martian

Erredakzioa

Bilboko urigintzea, arkitekturea ta artea aztertze-ko *symposium* bat egingo dabe martian, Bidebarrietan liburutegian. Ekimena Eusko Ikaskuntzak, Udalak eta Bidebarrieta Kultureguneak alkarregaz antolatu dabe. Aztertuko daben gaia hau izango da: *Etxebizitzaren giroa eta arazoa: Bilboren sorreratik gaur egunera arte*.

Etxebizitzaren ganeko arazoa bere osotasunean aztertu gura dabela jakin eragin dabe antolatzaileek: historia, etxebizitza motak, eta arazoak.

bidaide gogaide

EUSKAL HERRIKO MENDI TXANGOEN:

- Datuak
- Ibilbidea
- Jakingarriak

www.Egunkaria.com/bidaide

XX. ARTISAUTZA AZOKA

BILBOKO AREATZAN ABENDUAREN 19TIK URTARRILAREN 6RA

FERIA DE ARTESANÍA EL ARENAL, BILBAO. DEL 19 DICIEMBRE AL 6 DE ENERO.

Bizkaiko Foru Aldundia
Gobernuzkoen Sarea
Diputación Foral de Bizkaia
Departamento de Promoción Económica

BIARTEA